

სსიპ - ივანე ჯავახიშვილის სახელობის თბილისის სახელმწიფო უნივერსიტეტის დამოუკიდებელი სამეცნიერო-კვლევითი ერთეულის - არნოლდ ჩიქობავას სახელობის ენათმეცნიერების ინსტიტუტის დირექტორის კანდიდატურის შერჩევის წესი

მუხლი 1. დირექტორის კანდიდატურის შერჩევის ორგანიზაციული საკითხები

1. სსიპ - ივანე ჯავახიშვილის სახელობის თბილისის სახელმწიფო უნივერსიტეტის (შემდგომში - „უნივერსიტეტი“ ან „თსუ“) დამოუკიდებელი სამეცნიერო-კვლევითი ერთეულის - არნოლდ ჩიქობავას სახელობის ენათმეცნიერების ინსტიტუტის (შემდგომში - „ინსტიტუტი“) დირექტორის კანდიდატურის შერჩევის პროცედურას ატარებს და შერჩევის დღეს განსაზღვრავს ინსტიტუტის სამეცნიერო საბჭო.

2. შერჩევის პროცედურა ტარდება ინსტიტუტის სამეცნიერო საბჭოს სხდომაზე. თუ ინსტიტუტის დირექტორი/დირექტორის მოვალეობის შემსრულებელი არის სამეცნიერო საბჭოს თავმჯდომარე და ამავდროულად დირექტორობის კანდიდატი, მას არა აქვს სხდომის თავმჯდომარეობის უფლება და სამეცნიერო საბჭოს სხდომის თავმჯდომარეს სხდომის დაწყებამდე ირჩევს საბჭო თავისი შემადგენლობიდან.

მუხლი 2. დირექტორის კანდიდატურის შერჩევის გამოცხადება

1. დირექტორის კანდიდატურის შერჩევის პროცედურის დაწყების შესახებ განცხადებას ადგენს ინსტიტუტის სამეცნიერო საბჭო. განცხადებაში აისახება დირექტორის კანდიდატურისათვის დადგენილი მოთხოვნები, წარმოსადგენი დოკუმენტაციისა თუ ინფორმაციის სახეობები, მათი წარმოდგენის ადგილი, ვადები და სხვა პროცედურული საკითხები.

2. იმ შემთხვევაში, თუ სამეცნიერო საბჭოს მიერ მიღებული იქნება გადაწყვეტილება დირექტორის კანდიდატურის შერჩევის პროცედურაში კანდიდატად 65 წელს მიღწეული ან მეტი ასაკის მქონე პირის მონაწილეობის დასაშვებობაზე, ეს გადაწყვეტილება უნდა გაეგზავნოს თსუ აკადემიურ საბჭოს დასამტკიცებლად დირექტორის კანდიდატურის შესარჩევად კონკურსის გამოცხადებამდე 5 დღით ადრე მაინც.

3. ამ მუხლით განსაზღვრული ინფორმაცია და ასევე წინამდებარე წესი საჯაროდ განთავსებას ექვემდებარება უნივერსიტეტის ვებ-გვერდზე დირექტორის კანდიდატურის შერჩევის პროცედურის დაწყებამდე არაუგვიანეს 3 დღისა.

მუხლი 3. დირექტორისათვის დადგენილი მოთხოვნები

1. დირექტორობის კანდიდატად შეიძლება შერჩეული იქნეს და დირექტორის თანამდებობა შეიძლება დაიკავოს პირმა, რომელიც აკმაყოფილებს ამ მუხლით განსაზღვრულ და ინსტიტუტის მთავარი მეცნიერი თანამშრომლისთვის დადგენილ მოთხოვნებს, რაც გათვალისწინებულია აკადემიური საბჭოს 2017 წლის 31 მაისის N63/2017 დადგენილებით მიღებული და წარმომადგენლობითი საბჭოს 2017 წლის 23 ივნისის N3 სხდომის ოქმით დამტკიცებული „სსიპ - ივანე ჯავახიშვილის სახელობის თბილისის სახელმწიფო უნივერსიტეტის დამოუკიდებელი სამეცნიერო-კვლევითი ერთეულის სამეცნიერო პერსონალის სამსახურში მიღების ერთიანი წესი“-თ და სამეცნიერო თანამდებობის დაკავების დამატებითი პირობების მე-2 მუხლითა და „საკონკურსო თანამდებობებისათვის განსაზღვრული კრიტერიუმები ინსტიტუტების და სამეცნიერო თანამდებობების მიხედვით“ მე-14 მუხლით (უვადო ან ვადიანი მთავარი მეცნიერი თანამშრომლის თანამდებობისთვის დადგენილი შესაბამისი მოთხოვნები).

2. დირექტორობის კანდიდატად შესარჩევ პირს უნდა ჰქონდეს:

- ა) სამეცნიერო დაწესებულების ან/და სამეცნიერო დაწესებულების სამეცნიერო სტრუქტურული ერთეულის მართვის არანაკლებ 5 წლის გამოცდილება;
- ბ) საერთაშორისო და ადგილობრივი სამეცნიერო ფორუმების საორგანიზაციო ან/და სამეცნიერო კომიტეტების ხელმძღვანელობის/წევრობის გამოცდილება.
- გ) სამეცნიერო პუბლიკაციების (პერიოდული გამოცემების, მონოგრაფიების, კრებულების...) რედაქტორობისა და/ან სარედაქციო კოლეგიის წევრობის გამოცდილება.

მუხლი 4. დირექტორობის კანდიდატობის მსურველთა განცხადებების მიღების წესი

1. დირექტორის თანამდებობის დაკავების მსურველი პირის განცხადება წარმოდგენილი უნდა იქნას ინსტიტუტის სამეცნიერო საბჭოს სახელზე. განცხადებაში მითითებული უნდა იყოს დაინტერესებული პირის ვინაობა, საცხოვრებელი ადგილის მისამართი, საკონტაქტო ტელეფონის ნომერი, ელ. ფოსტის მისამართი.

2. დირექტორის თანამდებობის დაკავების მსურველმა პირმა განცხადებასთან ერთად უნდა წარმოადგინოს:

- ა) პირადობის მოწმობის ან პასპორტის სურათიანი გვერდის ასლი;
- ბ) ავტობიოგრაფია (CV), სამეცნიერო პუბლიკაციების ნუსხითურთ, შედგენილი კონკურსანტისათვის მისაღები ფორმით მისი მოღვაწეობის სრულად ასასახავად (ავტობიოგრაფია წარმოდგენილი უნდა იყოს როგორც ნაბეჭდი, ისე ელექტრონული (CD) სახით, ფაილის ფორმატი – Word და PDF ფაილების სახით);
- გ) ორი ფოტოსურათი (3X4);
- დ) შესაბამისი აკადემიური ხარისხის დამადასტურებელი დოკუმენტის (დოკუმენტების) ასლი, უცხო ქვეყანაში მიღებული განათლების ან/და სამეცნიერო ხარისხის (ასეთის არსებობის შემთხვევაში) აღიარების კანონმდებლობით დადგენილი წესით გაცემული დოკუმენტის (დოკუმენტების) ასლი;
- ე) სამსახურეობრივი გამოცდილების ამსახველი კანონმდებლობით დადგენილი წესით გაცემული დოკუმენტი (ცნობა/შრომის წიგნაკის ასლი/სხვ.);
- ვ) სამეცნიერო-ორგანიზაციული მუშაობის გამოცდილების დამადასტურებელი დოკუმენტი;
- ზ) ინსტიტუტის დებულებიდან გამომდინარე ინსტიტუტის წინაშე მდგარი ამოცანების გადაჭრისა და ფუნქციების შესრულების, აგრეთვე ინსტიტუტის შემდგომი განვითარების მისეული ხედვა.

3. დირექტორობის კანდიდატის სტატუსის მოსაპოვებლად განცხადების წარმოდგენი დაინტერესებული პირი რეგისტრირებულად ჩაითვლება, თუ იგი დადგენილ ვადაში ინსტიტუტის სამეცნიერო საბჭოსათვის გადასაცემად თსუ კანცელარიაში სრულყოფილად წარმოადგენს ამ მუხლითა და დირექტორის კანდიდატურის შერჩევის პროცედურის დაწყების შესახებ განცხადებით გათვალისწინებულ დოკუმენტაციას.

მუხლი 5. დირექტორობის კანდიდატის შერჩევის პროცედურა

1. დირექტორის კანდიდატურას 5 წლის ვადით, როგორც წესი, ღია კენჭისყრის საფუძველზე შეარჩევს ინსტიტუტის სამეცნიერო საბჭო და დასამტკიცებლად წარუდგენს აკადემიურ საბჭოს.

2. სამეცნიერო საბჭო თავის სხდომაზე განიხილავს დირექტორობის კანდიდატობის მსურველთა განცხადებებსა და მათზე დართულ დოკუმენტაციას და ნიშნავს კენჭისყრის დღეს.

3. კენჭისყრა დირექტორობის კანდიდატის შესარჩევად ტარდება სამეცნიერო საბჭოს სხდომაზე კენჭისყრისათვის განსაზღვრულ დღეს 14⁰⁰-დან 16⁰⁰ სთ-მდე.

4. საჭიროების შემთხვევაში შერჩევის პროცედურების უზრუნველყოფის მიზნით კენჭისყრის დაწყებამდე სამეცნიერო საბჭო ღია კენჭისყრით საბჭოს წევრთაგან ირჩევს ხმის დამთვლელ კომისიას არანაკლებ 3 (სამი) და არაუმეტეს 5 (ხუთი) წევრის შემადგენლობით. ხმის დამთვლელი კომისიის წევრების შერჩევის შემდეგ სამეცნიერო საბჭოს წევრს უფლება აქვს ხმა მისცეს სასურველ კანდიდატს.

5. სამეცნიერო საბჭოს წევრი უფლებამოსილია ხმა მისცეს დირექტორობის მხოლოდ ერთ კანდიდატს.

6. სამეცნიერო საბჭოს სხდომა უფლებამოსილია, თუ მას ესწრება სრული შემადგენლობის ნახევარზე მეტი. დირექტორობის კანდიდატად შერჩეულად ჩაითვლება პირი, რომელსაც ხმა მისცა საბჭოს სიითი შემადგენლობის ნახევარზე მეტმა. თუ ვერცერთმა კანდიდატმა ვერ დააგროვა ხმების საკმარისი რაოდენობა, იმავე დღეს (ჩატარების დრო დგინდება სამეცნიერო საბჭოს მიერ) გაიმართება განმეორებითი (დამატებითი) კენჭისყრა, რომელშიც მონაწილეობას იღებს ორი საუკეთესო შედეგის მქონე პირი. დამატებითი კენჭისყრის შედეგად შერჩეულად ჩაითვლება პირი, რომელსაც ხმა მისცა საბჭოს სიითი შემადგენლობის ნახევარზე მეტმა. იმ შემთხვევაში, თუ დამატებითი კენჭისყრის შედეგადაც ვერცერთმა პირმა ვერ მიიღო სამეცნიერო საბჭოს წევრთა სიითი შემადგენლობის უმრავლესობა, დირექტორის შერჩევის პროცედურა ცხადდება და ტარდება ხელახლა, მოქმედი კანონდებლობისა და წინამდებარე წესის მოთხოვნათა დაცვით.

7. კენჭისყრის სხდომის დაწყებიდან საბოლოო შედეგების გამოვლენამდე ხმის დამთვლელი კომისიის საქმიანობა ხორციელდება სამეცნიერო საბჭოს სხდომაზე საბჭოს წევრთა თანდასწრებით.

8. ხმის დამთვლელი კომისია უფლებამოსილია მიიღოს კენჭისყრის პროცედურებთან დაკავშირებული ნებისმიერი გადაწყვეტილება წინამდებარე წესით განსაზღვრულ ფარგლებში.

9. შერჩევის პროცედურის შედეგები ცხადდება სამეცნიერო საბჭოს სხდომაზე ხმის დათვლის პროცედურის დასრულების შემდგომ და სხვა აუცილებელ ინფორმაციასთან ერთად შეიტანება სხდომის ოქმში. სხდომის ოქმის შინაარსი გაეცნობა საბჭოს წევრებს და მას ხელს აწერენ სამეცნიერო საბჭოს (საბჭოს სხდომის) თავმჯდომარე და მდივანი. სხდომის ოქმი, რომელშიც ასახულია ინსტიტუტის დირექტორის კანდიდატურის შერჩევის შედეგები, სამეცნიერო საბჭოს თავმჯდომარის კორესპონდენციით ეგზავნება უნივერსიტეტის აკადემიურ საბჭოს კანონმდებლობით დადგენილი წესით შემდგომი რეაგირებისათვის.

10. დირექტორის კანდიდატურის შერჩევის შედეგები შესაძლებელია გასაჩივრდეს კანონმდებლობით დადგენილი წესით საქართველოს სასამართლოში.

მუხლი 6. დირექტორობის კანდიდატის შერჩევის პროცედურა (ფარული კენჭისყრით)

1. სამეცნიერო საბჭო უფლებამოსილია განიხილოს დირექტორობის კანდიდატის შერჩევის მიზნით კენჭისყრის ფარული წესით ჩატარების საკითხი.

2. კენჭისყრის ფარული წესით ჩატარების გადაწყვეტილების მიღების შემთხვევაში:

ა) შესაბამისი პროცედურების უზრუნველყოფის მიზნით კენჭისყრის დაწყებამდე სამეცნიერო საბჭო ღია კენჭისყრით საბჭოს წევრთაგან ირჩევს ხმის დამთვლელ კომისიას 3 (სამი) წევრის შემადგენლობით;

ბ) ხმის დამთვლელი კომისიის წევრების არჩევის შემდეგ სამეცნიერო საბჭოს წევრს უფლება აქვს ხმა მისცეს სასურველ, მხოლოდ ერთ კანდიდატს;

გ) ხმის დამთვლელი კომისია უფლებამოსილია მიიღოს პროცედურებთან დაკავშირებული ნებისმიერი გადაწყვეტილება წინამდებარე წესით განსაზღვრულ ფარგლებში;

დ) საარჩევნო სიაში შედის სამეცნიერო საბჭოს ყველა წევრი. საარჩევნო სიაში მოცემულია სამეცნიერო საბჭოს წევრის სახელი და გვარი; გადასატანი საარჩევნო ყუთის გამოყენების შემთხვევაში დგება ამ ყუთით მოსარგებლე ამომრჩეველთა ცალკე სია;

ე) კენჭისყრის დაწყებამდე ხმის დამთვლელი კომისიის წევრები სამეცნიერო საბჭოს თანდასწრებით ითვლიან ცარიელ ბიულეტენებს. ბიულეტენების რაოდენობა უნდა უტოლდებოდეს სამეცნიერო საბჭოს წევრების რაოდენობას, რომელსაც ემატება 3 სარეზერვო ბიულეტენი. სარეზერვო ბიულეტენები გამოიყენება გამოუყენებელი ბიულეტენის დაზიანების შემთხვევაში. გამოუყენებელ ბიულეტენად მიიჩნევა ბიულეტენი საარჩევნო ყუთში ჩაგდებად.

3. სამეცნიერო საბჭოს სხდომა უფლებამოსილია, თუ მას ესწრება სრული შემადგენლობის ნახევარზე მეტი. დირექტორობის კანდიდატად შერჩეულად ჩაითვლება პირი, რომელსაც ხმა მისცა საბჭოს სიითი შემადგენლობის ნახევარზე მეტმა. თუ ვერცერთმა კანდიდატმა ვერ დააგროვა ხმების საკმარისი რაოდენობა, იმავე დღეს (ჩატარების დრო დგინდება სამეცნიერო საბჭოს მიერ) გაიმართება განმეორებითი (დამატებითი) კენჭისყრა, რომელშიც მონაწილეობას იღებს ორი საუკეთესო შედეგის მქონე პირი. დამატებითი კენჭისყრის შედეგად შერჩეულად ჩაითვლება პირი, რომელსაც ხმა მისცა საბჭოს სიითი შემადგენლობის ნახევარზე მეტმა. იმ შემთხვევაში, თუ დამატებითი კენჭისყრის შედეგადაც ვერცერთმა პირმა ვერ მიიღო სამეცნიერო საბჭოს წევრთა სიითი შემადგენლობის უმრავლესობა, დირექტორის შერჩევის პროცედურა ცხადდება და ტარდება ხელახლა, მოქმედი კანონდებლობისა და წინამდებარე წესის მოთხოვნათა დაცვით.

4. კენჭისყრის სხდომის დაწყებიდან საბოლოო შედეგების გამოვლენამდე ხმის დამთვლელი კომისიის საქმიანობა ხორციელდება სამეცნიერო საბჭოს სხდომაზე საბჭოს წევრთა თანდასწრებით.

5. ხმის დამთვლელი კომისია უფლებამოსილია მიიღოს კენჭისყრის პროცედურებთან დაკავშირებული ნებისმიერი გადაწყვეტილება წინამდებარე წესით განსაზღვრულ ფარგლებში.

6. კენჭისყრა ტარდება კენჭისყრისათვის განსაზღვრულ დღეს 14⁰⁰-დან 16⁰⁰ სთ-მდე.

7. სამეცნიერო საბჭოს წევრის მიერ ხმის მიცემა ხორციელდება საარჩევნო ბიულეტენზე სასურველი კანდიდატის რიგითი ნომრის შემოხაზვით და საარჩევნო ყუთში მოთავსებით. ბიულეტენების დაბეჭდვაზე პასუხისმგებელია ინსტიტუტის დირექტორი.

8. საარჩევნო ბიულეტენზე აღინიშნება:

ა) ინსტიტუტის სახელწოდება;

ბ) ინფორმაცია იმის შესახებ, რომ ბიულეტენი განკუთვნილია ინსტიტუტის დირექტორობის კანდიდატის შესარჩევად;

გ) კანდიდატების ჩამონათვალი და მათი რიგითი ნომრების თანმიმდევრობა, დალაგებული ანბანის მიხედვით;

დ) საარჩევნო ბიულეტენი დამოწმებული უნდა იყოს სამეცნიერო საბჭოს თავმჯდომარის ხელმოწერით.

9. ინსტიტუტის დირექტორი უზრუნველყოფს ხმის დამთვლელი კომისიის საარჩევნო ყუთით აღჭურვას, რომელიც კენჭისყრის დაწყებამდე მოწმდება, რათა ხმის დამთვლელი კომისიის წევრები და სამეცნიერო საბჭოს წევრები დარწმუნდნენ, რომ იგი ცარიელია. კენჭისყრის დაწყებამდე საარჩევნო ყუთი ილუქება კომისიის წევრთა მიერ სამეცნიერო საბჭოს წევრების თანდასწრებით.

10. საარჩევნო ყუთი განთავსებული უნდა იყოს კენჭისყრის სხდომის ოთახში თვალსაჩინო ადგილას.

11. საბჭოს იმ წევრებისთვის, რომლებიც ავადმყოფობის გამო ვერ შეძლებენ კენჭისყრის სხდომაზე მოსვლას, გამოყენებული იქნება გადასატანი სარჩევნო ყუთი, რომელიც ილუქება კომისიის წევრთა მიერ სამეცნიერო საბჭოს წევრების თანდასწრებით.

11. გადასატანი სარჩევნო ყუთით სარგებლობის შესახებ საბჭოს წევრი არჩევნების წინა დღის 17.00 საათამდე მიმართავს სამეცნიერო საბჭოს თავმჯდომარეს განცხადებით, რომ ის შეტანილ იქნეს გადასატანი საარჩევნო ყუთით მოსარგებლე ამომრჩეველთა სიაში.

12. გადასატანი საარჩევნო ყუთის ამომრჩეველთან მიტანა ევალეზა ხმის დამთვლელი კომისიის ორ წევრს, რომელთაც დამკვირვებლის სტატუსით შეიძლება ახლდეს სამეცნიერო საბჭოს წევრი/წევრები.

13. ხმის დამთვლელი კომისიის იმ წევრებს, რომელიც პასუხისმგებელია გადასატანი საარჩევნო ყუთის ამომრჩეველთან მიტანაზე, კომისია გადასცემს:

- ა) გადასატანი საარჩევნო ყუთით სარგებლობის მსურველ ამომრჩეველთა სიას;
- ბ) საჭირო რაოდენობის საარჩევნო ბიულეტენებს;
- გ) დალუქულ გადასატან საარჩევნო ყუთს.

14. დირექტორობის კანდიდატურის შერჩევა ხორციელდება სამეცნიერო საბჭოს სხდომაზე.

15. კენჭისყრის სხდომაზე სამეცნიერო საბჭოს წევრი ხმის დამთვლელი კომისიის წევრისაგან იღებს ერთ საარჩევნო ბიულეტენს, რასაც ადასტურებს ამომრჩეველთა სიაში თავისი გვარის გასწვრივ ხელმოწერით. ბიულეტენს ხელი უნდა მოაწეროს ხმის დამთვლელი კომისიის ყველა წევრმა.

16. სამეცნიერო საბჭოს წევრი შედის სპეციალურად მოწყობილ საარჩევნო კუთხეში, აკეთებს არჩევანს და აგდებს ბიულეტენს საარჩევნო ყუთში. საარჩევნო კუთხედ ითვლება ნებისმიერი განცალკევებული ადგილი, სადაც ხმის მიცემის ფარულობა დაცული იქნება;

17. სამეცნიერო საბჭოს წევრს უფლება აქვს ხმა მისცეს მხოლოდ ერთ კანდიდატს.

18. კენჭისყრის სხდომის დაწყებიდან საბოლოო შედეგების გამოვლენამდე ხმის დამთვლელი კომისიის საქმიანობა ხორციელდება სამეცნიერო საბჭოს სხდომაზე საბჭოს წევრთა თანდასწრებით.

19. კენჭისყრის დასრულების შემდეგ ხმის დამთვლელი კომისია სამეცნიერო საბჭოს წევრთა თანდასწრებით ხსნის საარჩევნო ყუთს ან ყუთებს (გადასატანი საარჩევნო ყუთის გამოყენების შემთხვევაში) და ითვლის ბიულეტენების საერთო რაოდენობას. ბიულეტენების საერთო რაოდენობა არ უნდა აღემატებოდეს ამომრჩეველთა სიაში/სიებში (გადასატანი საარჩევნო ყუთის გამოყენების შემთხვევაში) სამეცნიერო საბჭოს წევრთა ხელმოწერების რაოდენობას.

20. ბიულეტენების საერთო რაოდენობის დათვლის შემდეგ ხმის დამთვლელი კომისიის წევრები ითვლიან თითოეული კანდიდატისათვის მიცემული ხმების რაოდენობას.

21. საარჩევნო ბიულეტენი მხოლოდ იმ შემთხვევაში მიიჩნევა ბათილად, თუ:

- ა) საარჩევნო ბიულეტენი დამოწმებული არ არის ხმის დამთვლელი კომისიის შესაბამის უფლებამოსილ წევრთა ხელმოწერით;
- ბ) შეუძლებელია იმის დადგენა, რომელ საარჩევნო სუბიექტს მისცა ხმა ამომრჩეველმა;
- გ) საარჩევნო ბიულეტენი არ შეიცავს მე-6 მუხლის მე-7 პუნქტით გათვალისწინებულ ყველა რეკვიზიტს.

22. ხმების დათვლის შემდეგ ხმის დამთვლელი კომისიის წევრების მიერ ივსება **შემაჯამებელი ოქმი**, რომელშიც შედის შემდეგი მონაცემები:

- ა) ამომრჩეველთა რაოდენობა საარჩევნო სიის მიხედვით;
- ბ) კენჭისყრაში მონაწილე ამომრჩეველთა რაოდენობა საარჩევნო სიაში/სიებში ამომრჩეველთა ხელმოწერების მიხედვით;
- გ) საარჩევნო ყუთში/ყუთებში აღმოჩენილი საარჩევნო ბიულეტენების საერთო რაოდენობა;
- დ) ბათილი საარჩევნო ბიულეტენების რაოდენობა;
- ე) თითოეული კანდიდატის მიერ მოპოვებული ხმების რაოდენობა;
- ვ) კომისიის ყველა წევრის ხელმოწერა.

23. შერჩევის პროცედურა ჩატარებულად ითვლება, თუ მასში მონაწილეობა მიიღო სამეცნიერო საბჭოს წევრთა სრული შემადგენლობის ნახევარზე მეტმა.

24. დირექტორობის კანდიდატად შერჩეულად ჩაითვლება პირი, რომელსაც ხმა მისცა საბჭოს სიითი შემადგენლობის ნახევარზე მეტმა. თუ ვერცერთმა კანდიდატმა ვერ დააგროვა ხმების საკმარისი რაოდენობა, იმავე დღეს (ჩატარების დრო დგინდება სამეცნიერო საბჭოს მიერ) გაიმართება მეორე ტური. შერჩევის პროცედურის მეორე ტური გაიმართება იმავე დღეს, შერჩევის პროცედურის პირველი ტურის დასრულების შემდეგ არაუგვიანეს 2 (ორი) საათისა. მეორე ტურში მონაწილეობს პირველი ორი საუკეთესო შედეგის მქონე კანდიდატი. მეორე ტურში გამარჯვებულად ჩაითვლება კანდიდატი, რომელიც მიიღებს ხმების სიითი შემადგენლობის ნახევარზე მეტს.

25. შერჩევის პროცედურის შედეგები ცხადდება სამეცნიერო საბჭოს სხდომაზე, ხმის დათვლის პროცედურის დასრულების შემდგომ და სხვა აუცილებელ ინფორმაციასთან ერთად შეიტანება სხდომის ოქმში. სხდომის ოქმის შინაარსი გაეცნობა საბჭოს წევრებს და მას ხელს აწერს სამეცნიერო საბჭოს (საბჭოს სხდომის) თავმჯდომარე და მდივანი. სხდომის ოქმი, რომელსაც უნდა დაერთოს შემაჯამებელი ოქმი, სამეცნიერო საბჭოს თავმჯდომარის კორესპონდენციით ეგზავნება უნივერსიტეტის აკადემიურ საბჭოს კანონმდებლობით დადგენილი წესით შემდგომი რეაგირებისათვის.

26. დირექტორის კანდიდატურის შერჩევის შედეგები შესაძლებელია გასაჩივრდეს კანონმდებლობით დადგენილი წესით საქართველოს სასამართლოში.

მუხლი 7. დასკვნითი დებულებები

წინამდებარე წესი ცნობისათვის ეგზავნება უნივერსიტეტის რექტორსა და ადმინისტრაციას.